

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH

<http://www.parlimen.gov.my>

HARI RABU, 19 FEBRUARI 2025, PUKUL 10.00 PAGI

Bil. 9

PERTANYAAN-PERTANYAAN BAGI JAWAB LISAN

1. PR-1541-L28671
Tuan Tan Kok Wai [Cheras] minta **MENTERI EKONOMI** menyatakan secara terperinci, sejauh mana pencapaian Malaysia dalam setiap satu dari 17 aspek Matlamat Pembangunan Mampan PBB (UN SDG) serta apakah cabaran yang menyekat usaha negara untuk merealisasikan semua matlamat ini.
2. PR-1541-L27679
Tuan Wan Razali bin Wan Nor [Kuantan] minta **MENTERI KEMAJUAN DESA DAN WILAYAH** menyatakan adakah Kementerian bercadang untuk menambah baik syarat permohonan Projek Perumahan Rakyat Sejahtera (PPRS) supaya dapat memberi manfaat kepada golongan kurang berkemampuan yang memerlukan.
3. PR-1541-L29150
Tuan Pang Hok Liong [Labis] minta **MENTERI PELABURAN, PERDAGANGAN DAN INDUSTRI** menyatakan impak terhadap Malaysia untuk menjadi pusat data serantau selepas arahan terbaru Amerika Syarikat yang meletakkan Malaysia dalam kategori negara Tahap 2 berhubung akses terhadap eksport cip kecerdasan buatan (AI) negara itu serta langkah-langkah yang akan diambil oleh Kerajaan demi menghadapi masalah ekor dari daripada sekatan ini.

4. PR-1541-L27747
Tuan Haji Muhammad Islahuddin bin Abas [Mersing] minta **MENTERI BELIA DAN SUKAN** menyatakan status peruntukan RM20 juta dalam Belanjawan 2025 bagi pemerkasaan e-sukan dan adakah pihak KBS telah mengenal pasti lokasi pembinaan stadium e-Sukan baharu di seluruh negara dengan kerjasama E-Sport Integrated dalam memacu pembangunan ekosistem e-sukan serta pembangunan bakat e-sukan.
5. PR-1541-L28074
Tuan Ganabatirau A/L Veraman [Klang] minta **MENTERI KESIHATAN** menyatakan :
- (a) jumlah doktor pelatih yang telah diserap ke dalam fasiliti-fasilti kesihatan negara sepanjang tahun 2024 serta jangkaan untuk tahun 2025, khususnya di Hospital Klang; dan
 - (b) adakah Kementerian mempunyai statistik berkenaan jumlah doktor pelatih yang sedang menunggu penempatan setakat ini.
6. PR-1541-L27967
Datuk Seri Ir. Dr. Wee Ka Siong [Ayer Hitam] minta **MENTERI KERJA RAYA** menyatakan pendirian semasa Kerajaan dalam memuktamadkan hala tuju struktur tadbir sistem pembayaran tol 'Aliran Pantas Pelbagai Lorong' (MLFF) dan apakah status terbaharu rundingan bersama syarikat konsesi lebuh raya mengenai pelaksanaan MLFF ini.
7. PR-1541-L28961
Tuan Wan Ahmad Fayhsal bin Wan Ahmad Kamal [Machang] minta **MENTERI KOMUNIKASI** menyatakan :
- (a) justifikasi kenaikan harga minimum penghantaran barang kurier melalui Garis Panduan Harga Rujukan bagi Perkhidmatan Kurier sedangkan jumlah penjualan dalam talian semakin meningkat saban tahun; dan
 - (b) adakah Kementerian dapat memastikan harga perkhidmatan kurier ini tidak akan dinaikkan lagi bagi mengelak beban kepada rakyat.
8. PR-1541-L28896
Tuan Mohamad Shafizan Haji Kepli [Batang Lupa] minta **MENTERI PERTANIAN DAN KETERJAMINAN MAKANAN** menyatakan kerja-kerja serta kemudahan-kemudahan yang masih perlu disediakan di Kompleks Perikanan Lembaga Kemajuan Ikan Malaysia (LKIM) Beladin sebelum ianya dapat memulakan operasi sepenuhnya.

9. PR-1541-L28642

Dato' Rosol bin Wahid [Hulu Terengganu] minta **MENTERI PERUMAHAN DAN KERAJAAN TEMPATAN** menyatakan langkah Kementerian untuk menangani isu harga rumah yang semakin melonjak dan membebankan bakal pemilik rumah terutama dalam kalangan generasi muda yang baru berkerjaya.

10. PR-1541-L28243

Tuan Chiew Choon Man [Miri] minta **MENTERI SUMBER MANUSIA** menyatakan :

- (a) inisiatif Kementerian dalam memudahkan proses dan mengurangkan kos pengambilan pekerja asing; dan
- (b) adakah Kementerian mempertimbangkan untuk membenarkan pekerja asing berkemahiran bekerja di negara ini dengan jangka yang lebih lama, terutamanya di Sarawak.

11. PR-1541-L28514

Tuan Haji Abdul Latiff bin Abdul Rahman [Kuala Krai] minta **MENTERI KERJA RAYA** menyatakan apakah langkah mitigasi KKR bagi kerja-kerja pembaikan dan pencegahan di cerun berisiko tinggi termasuk zon Pantai Timur untuk mengurangkan risiko insiden tanah runtuh serta penggunaan teknologi baharu bagi tujuan pengesanan awal kejadian terutama di kawasan zon merah berisiko tinggi.

12. PR-1541-L27851

Datuk Hajah Siti Aminah binti Aching [Beaufort] minta **MENTERI PERTANIAN DAN KETERJAMINAN MAKANAN** menyatakan melalui kolaborasi strategik LPNM dan LPP bagi usaha pembangunan penanaman nanas di negeri Sabah, apakah bentuk teknologi yang telah diusahakan dalam meningkatkan kualiti penanaman nanas.

13. PR-1541-L28301

Dato' Dr. Ahmad Yunus bin Hairi [Kuala Langat] minta **MENTERI KESIHATAN** menyatakan status Projek Digitalisasi Kesihatan Negara dan bagaimana kemampuan pangkalan data untuk memastikan projek digitalisasi sektor kesihatan negara ini dapat dilaksanakan dengan jayanya.

14. PR-1541-L28835

Dato' Haji Shamshulkahar bin Mohd Deli [Jempol] minta **MENTERI EKONOMI** menyatakan apakah Kerajaan bercadang untuk melaksanakan pengelasan semula kumpulan pendapatan 40 peratus terendah (B40), 40 peratus pertengahan (M40) dan 20 peratus tertinggi (T20) yang kini tidak mencerminkan realiti stratifikasi ekonomi isi rumah di Malaysia berdasarkan kajian terkini oleh Institut Penyelidikan Khazanah (KRI).

15. PR-1541-L28820

Datuk Wan Saifulruddin bin Wan Jan [Tasek Gelugor] minta **MENTERI PERUMAHAN DAN KERAJAAN TEMPATAN** menyatakan langkah-langkah yang telah dan akan diambil untuk mempermudah pelesenan penjaja tepi jalan dan penjaja sementara, terutama pada waktu kita menuju musim Ramadhan dan perayaan di seluruh negara, termasuk di Tasek Gelugor.

16. PR-1541-L28296

Dato' Seri Hishammuddin bin Tun Hussein [Sembrong] minta **MENTERI BELIA DAN SUKAN** menyatakan apakah inisiatif Kementerian untuk menangani isu kesihatan mental dalam kalangan belia termasuk penyediaan khidmat kaunseling dan platform sokongan komuniti secara percuma serta sejauh manakah kerjasama rentas Kementerian dalam mengatasi permasalahan ini.

17. PR-1541-L28440

Tuan Nurul Amin bin Hamid [Padang Terap] minta **MENTERI KESIHATAN** menyatakan apakah pelan jangka masa panjang daripada pihak Kementerian untuk mengatasi peningkatan jumlah penghidap HIV daripada golongan lelaki yang mempunyai hubungan seksual dengan lelaki yang dilihat menjadi golongan yang paling ramai menghidapi HIV berdasarkan kepada laporan Global AIDS Monitoring 2024.

18. PR-1541-L28629

Datuk Larry Soon @ Larry Sng Wei Shien [Julau] minta **MENTERI KOMUNIKASI** menyatakan perancangan untuk meningkatkan kualiti dan capaian sambungan internet di bawah inisiatif JENDELA 2, khususnya di Parlimen Julau yang masih menghadapi masalah kekurangan sambungan internet. Jelaskan pelan tindakan dan jangka masa pelaksanaan bagi memastikan kawasan ini turut mendapat manfaat daripada pembangunan digital negara.

19. PR-1541-L28580

Datuk Ali anak Biju [Saratok] minta **MENTERI KERJA RAYA** menyatakan :

- (a) unjuran garis masa membina jejantas bagi sekolah di Parlimen Saratok terutama melibatkan SK Brayang, SK Nanga Asam, SK Mendas dan SK Lichok yang terletak ditepi Lebuhraya Pan-Borneo; dan
- (b) adakah reka bentuk jejantas boleh diubah kepada jejantas khas pengguna motosikal yang sesuai dengan lokaliti dan penggunaan setempat.

20. PR-1541-L27811

Tuan Edwin anak Banta [Selangau] minta **MENTERI KEMAJUAN DESA DAN WILAYAH** menyatakan dapatkah Kementerian menggunakan strategi pemasangan *Solar System* di perkampungan rumah panjang yang mempunyai populasi tinggi dan jauh dari pekan yang susah mendapat bekalan elektrik.

21. PR-1541-L28099

Datuk Jonathan Yasin [Ranau] minta **MENTERI BELIA DAN SUKAN** menyatakan program-program serta pembangunan-pembangunan fizikal yang telah dan sedang dirancang oleh pihak Kementerian untuk membentuk belia-belia di daerah Ranau supaya para belia di daerah ini lebih sejahtera, makmur dan bersatu melalui pembangunan belia dan pembudayaan sukan.

22. PR-1541-L28756

Tuan Rushdan bin Rusmi [Padang Besar] minta **MENTERI KERJA RAYA** menyatakan adakah terdapat perancangan di peringkat Kementerian untuk membesarkan lorong di antara pintu masuk Malaysia-Thailand di Padang Besar dengan Kawasan Perindustrian Lembah Chuping (CVIA) sebagai pemangkin industri logistik serantau.

23. PR-1541-L28490

Dato' Mohd Isam bin Mohd Isa [Tampin] minta **MENTERI PERUMAHAN DAN KERAJAAN TEMPATAN** menyatakan strategi atau garis panduan untuk memastikan para syarikat pemaju perumahan membina kediaman rumah mampu milik yang berkualiti tinggi dan sentiasa menepati spesifikasi awal yang telah ditetapkan serta tidak mengabaikan para pembeli sekiranya berlaku sebarang kerosakan.

24. PR-1541-L28156

Dato' Sri Doris Sophia anak Brodi [Sri Aman] minta **MENTERI KESIHATAN** menyatakan :

- (a) apakah langkah-langkah yang diambil oleh Kementerian untuk mencegah penularan virus Human Metapneumovirus (HMPV) di Malaysia; dan
- (b) adakah Kementerian bercadang untuk meningkatkan fasiliti kesihatan, khususnya di kawasan luar bandar, bagi memastikan akses rawatan segera sekiranya berlaku kes penularan.

25. PR-1541-L28365

Dr. Haji Abd Ghani bin Ahmad [Jerlun] minta **MENTERI PERTANIAN DAN KETERJAMINAN MAKANAN** menyatakan berapa stok beras negara yang disimpan oleh BERNAS sehingga 31 Disember 2024 dan adakah Kementerian bercadang untuk menjadikan beras putih tempatan sebagai stok penimbal beras.

26. PR-1541-L28046

Datuk Jonathan Yasin [Ranau] minta **MENTERI KEMAJUAN DESA DAN WILAYAH** menyatakan bilakah projek menaik taraf jalan Kg. Rumantai, Kg. Miruru, Kg. Mantapok dan Kg. Mangkadait, Ranau, Sabah sejauh 14km yang telah dipohon dengan nama Menaik Taraf Jalan Miruru Mangkadait Ranau Sabah dalam Rolling Plan Kelima (RP5), RMKe-12 Tahun 2025 akan diluluskan Kementerian.

27. PR-1541-L28010

Tuan Zahari bin Kechik [Jeli] minta **MENTERI KEMAJUAN DESA DAN WILAYAH** menyatakan sejauh manakah penstrukturan semula gaji guru KEMAS dan TASKA selaras dengan pengumuman YAB Perdana Menteri kenaikan kadar gaji minimum daripada RM1,500 sebulan kepada RM1,700.

28. PR-1541-L28061

Dato' Sri Dr. Wee Jeck Seng [Tanjung Piai] minta **MENTERI KESIHATAN** menyatakan senarai hospital yang sedang diperincikan Kementerian di bawah inisiatif Rakan KKM dan bagaimana Kementerian dapat memastikan keperluan tenaga pakar mencukupi di kesemua hospital Kerajaan sebelum inisiatif ini dilaksanakan sepenuhnya.

29. PR-1541-L27706

Dr. Ahmad Fakhruddin bin Fakhruddin [Kuala Kedah] minta **MENTERI KERJA RAYA** menyatakan status terkini:

- (a) cadangan pembinaan jalan di pesisir pantai daripada Kampung Padang Garam, Kuala Kedah sehingga ke Kuala Jerlun; dan
- (b) projek menaik taraf Laluan 7 dari Persimpangan Lencongan Barat ke Persimpangan Simpang Tiga Kemboja.

30. PR-1541-L28662

Datuk Wetrom bin Bahanda [Kota Marudu] minta **MENTERI PERTANIAN DAN KETERJAMINAN MAKANAN** menyatakan sejauh mana tindakan pelaksanaan Kementerian dalam mengoptimumkan penggunaan tanah terbiar terutama di kawasan Kota Marudu bagi memastikan keterjaminan makanan negara dan mengelakkan terjadinya kekurangan bekalan makanan negara pada masa akan datang.

31. PR-1541-L(5)00302

Tuan Syed Saddiq bin Syed Abdul Rahman [Muar] minta **MENTERI KOMUNIKASI** menyatakan pelan untuk membolehkan capaian internet di kawasan luar bandar yang tidak mempunyai talian seperti di Kampung Sungai Gersik dan Kampung Sungai Pulai walaupun berada dalam lingkungan 5G oleh penyedia talian perkhidmatan.

[Pertanyaan di bawah PM 22(5)]

32. PR-1541-L29095

Dr. Kelvin Yii Lee Wuen [Bandar Kuching] minta **MENTERI KESIHATAN** menyatakan secara terperinci proses and mekanisme implementasi Ikhtiar Rakan KKM yang akan diperkenalkan melibatkan kerjasama Syarikat Pelaburan Berkaitan Kerajaan (GLIC) seperti yang diumumkan dalam Belanjawan bagi menyediakan pilihan perkhidmatan kesihatan berbayar pada kadar berpatutan kepada pesakit.

33. PR-1541-L27975

Tuan Zakri bin Hassan [Kangar] minta **MENTERI BELIA DAN SUKAN** menyatakan penjelasan berhubung Revolusi Harimau Malaya dalam menaikkan *ranking* bola sepak Malaysia dalam FIFA.

34. PR-1541-L29125

Tuan Syed Ibrahim bin Syed Noh [Ledang] minta **MENTERI EKONOMI** menyatakan pelaksanaan Dasar Gaji Progresif (DGP) dalam konteks:

- (a) berapa jumlah syarikat yang menyertai DGP dan rancangan meningkatkan jumlah berkenaan; dan

- (b) cabaran untuk mereformasi struktur gaji pekerja Malaysia dan meningkatkan gaji secara sistematik terutama dari segi daya saing majikan, tekanan kos operasi dan penerimaan pihak industri.

35. PR-1541-L27657

Tuan Muhammad Fawwaz bin Mohamad Jan [Permatang Pauh] minta **MENTERI PERUMAHAN DAN KERAJAAN TEMPATAN** menyatakan apakah Kementerian sudah menghentikan cadangan menjadikan Kampung Baru Cina sebagai tapak warisan UNESCO termasuk memutuskan kolaborasi dengan pihak lain yang mempunyai usaha menjayakan agenda ini.

36. PR-1541-L28112

Dato' Verdon bin Bahanda [Kudat] minta **MENTERI EKONOMI** menyatakan perancangan dan komitmen Kerajaan dalam kerjasama antara negara melalui BIMP-EAGA untuk merancakkan ekonomi serantau di wilayah Sabah dan Sarawak.

37. PR-1541-L28452

Tuan Mohd Nazri bin Abu Hassan [Merbok] minta **MENTERI PERTANIAN DAN KETERJAMINAN MAKANAN** menyatakan adakah Kementerian sedang menyiasat kemungkinan wujudnya kartel atau pihak tertentu yang memanipulasi bekalan beras tempatan atau disorok sehingga menyebabkan beras tempatan sukar diperoleh di dalam pasaran.

38. PR-1541-L28333

Dato' Sri Dr. Haji Ismail bin Haji Abd. Muttalib [Maran] minta **MENTERI KESIHATAN** menyatakan apakah langkah yang diambil oleh Kementerian dalam mengatasi penularan Virus HMPV (Human Metapneumovirus) dan berapa kes penularan yang direkodkan serta pihak manakah penyebar virus ini.

39. PR-1541-L28312

Dato' Haji Ahmad bin Saad @ Yahaya [Pokok Sena] minta **MENTERI KESIHATAN** menyatakan statistik penyakit kelamin yang berpunca daripada gejala songsang MSM serta nyatakan faktor yang mendorong kepada perkembangan gejala songsang tersebut di dalam negara ini.

40. PR-1541-L28252

Tuan Muhammad Ismi bin Mat Taib [Parit] minta **MENTERI PELABURAN, PERDAGANGAN DAN INDUSTRI** menyatakan statistik jumlah pelaburan yang diluluskan dan jumlah pelaburan langsung asing bagi tahun 2024.

41. PR-1541-L27925

Datuk Dr. Nik Muhammad Zawawi bin Haji Salleh [Pasir Puteh] minta **MENTERI PERTANIAN DAN KETERJAMINAN MAKANAN** menyatakan berapa hektar tanah terbiar yang telah dibangunkan projek penanaman padi yang menjadi fokus utama di bawah Program Pengukuhan Keterjaminan Makanan 2024 dan berapa jumlah pengeluaran padi yang telah berjaya ditambah dalam negara melalui inisiatif program tersebut.

42. PR-1541-L27651

Tuan Muhammad Fawwaz bin Mohamad Jan [Permatang Pauh] minta **MENTERI PERUMAHAN DAN KERAJAAN TEMPATAN** menyatakan apakah Kementerian merancang untuk merangka prosedur dan ketetapan terhadap JMB atau pihak pengurusan bangunan untuk memudahkan dan menyeragamkan penghantaran bungkusan parcel atau makanan untuk kediaman bertingkat seperti apartment dan flat.

43. PR-1541-L28212

Tuan Shaharizukirnain bin Abd. Kadir [Setiu] minta **MENTERI EKONOMI** menyatakan perincian tuntas mengenai mekanisme Perbelanjaan Asas Kehidupan Wajar (PAKW) berpandukan konsep Pendapatan Boleh Guna Bersih (NDI) yang telah dilaksanakan oleh Kerajaan sebagai langkah wajar bagi menangani isu keciciran serta kemiskinan dalam kalangan masyarakat terutamanya di kawasan pedalaman.

44. PR-1541-L28131

Datuk Iskandar Dzulkarnain bin Abdul Khalid [Kuala Kangsar] minta **MENTERI KESIHATAN** menyatakan pertimbangan Kementerian bagi menyenaraikan penaiktarafan Klinik Kesihatan Manong di bawah Rancangan Malaysia ke-13 dan apakah kriteria yang ditetapkan bagi memastikan kerja-kerja penaiktarafan klinik ini dapat dipercepat dengan mengambil kira keperluan yang mendesak.

45. PR-1541-L28704
Datuk Willie anak Mongin [Puncak Borneo] minta **MENTERI PERTANIAN DAN KETERJAMINAN MAKANAN** menyatakan adakah Kementerian akan memperuntukan dana khas bagi projek penanaman '*rock melon*' atau tanaman lain dengan menggunakan kaedah fertigasi dan Rumah Hijau yang mampu memberi manfaat kepada orang kampung di dalam Parlimen masing-masing. Dan sekiranya inisiatif seperti ini sudah dilaksanakan, sejauh manakah pencapaiannya setakat ini.
46. PR-1541-L27621
Tuan Hassan bin Abdul Karim [Pasir Gudang] minta **MENTERI EKONOMI** menyatakan jaminan syarikat-syarikat dan pelabur-pelabur tempatan tidak terpinggir atau terabai akibat kemasukan ramai pelabur-pelabur mega dari luar negara di Zon Ekonomi Khas Johor-Singapura.
47. PR-1541-L28110
Kapten Dato' Dr. Zulkaferi bin Hanapi (Bersara) [Tanjong Karang] minta **MENTERI KEMAJUAN DESA DAN WILAYAH** menyatakan perancangan Kementerian untuk memastikan infrastruktur luar bandar dapat dimodenkan sepenuhnya menjelang 2030.
48. PR-1541-L28575
Tuan Cha Kee Chin [Rasah] minta **MENTERI PERTANIAN DAN KETERJAMINAN MAKANAN** menyatakan apakah ada perancangan khusus daripada pihak Kementerian dan agensi terbabit dalam memajukan sektor penternakan lembu pedaging hybrid dengan menjadikannya sebagai sektor yang berdaya maju, sambil meningkatkan kadar sara diri (SSR) untuk daging premium. Apakah sasaran untuk SSR bagi daging premium menjelang tahun 2030.
49. PR-1541-L27968
Ir. Ts. Zahir bin Hassan [Wangsa Maju] minta **MENTERI EKONOMI** menyatakan :
(a) apakah model kejayaan dalam kerjasama mewujudkan zon ekonomi antara dua buah negara di dunia; dan
(b) apakah Faktor Kejayaan Kritikal (CSF) dalam melaksanakan Johor Singapore Special Economic Zone (JSSEZ).
50. PR-1541-L28088
Dato' Haji Mohd Suhaimi bin Abdullah [Langkawi] minta **MENTERI KOMUNIKASI** menyatakan apakah hukuman kepada pengendali platform media sosial yang gagal memohon lesen Penyedia Media Sosial.

51. PR-1541-L27988

Datuk Seri Panglima Madius Tangau [Tuaran] minta **MENTERI KEMAJUAN DESA DAN WILAYAH** menyatakan perancangan Kementerian dalam membina dan menaik taraf Jalan Pekan Nabalu-Giuk-Sinulihan-Pahu sebagai laluan utama penduduk dan murid ke Sekolah Menengah Kebangsaan (SMK) Nabalu yang kini dalam proses pembinaan di tapak yang baharu.

52. PR-1541-L28130

Datuk Iskandar Dzulkarnain bin Abdul Khalid [Kuala Kangsar] minta **MENTERI KOMUNIKASI** menyatakan status terbaharu pelaksanaan rangkaian 5G kedua negara oleh U Mobile dan bagaimana Kementerian dapat memastikan kemampanan masa depan Digital Nasional Berhad (DNB) yang kini secara rasminya telah kehilangan statusnya sebagai model Rangkaian Borong Tunggal (SWN).

53. PR-1541-L28453

Tuan Haji Kamal bin Ashaari [Kuala Krau] minta **MENTERI KESIHATAN** menyatakan perkembangan terkini status pembinaan Klinik Kesihatan Kuala Krau yang baharu serta tarikh akan bermulanya pembinaan ini.

54. PR-1541-L27671

Puan Syerleena binti Abdul Rashid [Bukit Bendera] minta **MENTERI KESIHATAN** menyatakan :

- (a) langkah-langkah yang akan diambil KKM untuk memastikan harga dan bekalan ubat di sektor awam dan swasta adalah stabil di samping memastikan akses kepada ubat-ubatan inovatif tidak dikekang; dan
- (b) bagaimana Kementerian memastikan syarikat farmaseutikal besar tidak menjejaskan akses kepada ubat inovatif.

55. PR-1541-L28377

Tuan Oscar Ling Chai Yew [Sibul] minta **MENTERI PELABURAN, PERDAGANGAN DAN INDUSTRI** menyatakan rancangan untuk menghadapi kemungkinan sekatan atau tarif import yang dikenakan oleh Amerika Syarikat di bawah dasar ekonomi presidennya yang baharu serta impak yang dijangka terhadap ekonomi Malaysia.

56. PR-1541-L28122
Kapten Dato' Dr. Zulkaferi bin Hanapi (Bersara) [Tanjong Karang] minta **MENTERI KESIHATAN** menyatakan langkah-langkah yang diambil untuk memastikan hospital di kawasan luar bandar dilengkapi dengan teknologi terkini.
57. PR-1541-L28598
Tuan Sivakumar Varatharaju Naidu [Batu Gajah] minta **MENTERI KESIHATAN** menyatakan langkah-langkah khusus dalam menangani jurang ketidakseimbangan bilangan doktor pakar serta kemudahan hospital di kawasan luar bandar, termasuk perancangan penempatan strategik dan pembinaan kemudahan kesihatan di bawah Rancangan Malaysia Ke-12.
58. PR-1541-L28437
Tuan Haji Manndzri bin Haji Nasib [Tenggara] minta **MENTERI PERTANIAN DAN KETERJAMINAN MAKANAN** menyatakan pendekatan yang diguna pakai oleh pihak Kementerian bagi memperkasa peranan TVET pertanian yang semakin kebelakang serta bukan sebagai pilihan utama anak muda serta apakah langkah yang diambil bagi meremajakan industri pertanian bagi mengurangkan kebergantungan import makanan luar.
59. PR-1541-L29004
Dato' Haji Adnan bin Haji Abu Hassan [Kuala Pilah] minta **MENTERI PERUMAHAN DAN KERAJAAN TEMPATAN** menyatakan perancangan untuk meminda Akta Pemberi Pinjam Wang 1951 (Akta 400) untuk meningkatkan hukuman kepada Syarikat Pemberi Pinjam Wang (PPW) agar mereka mematuhi syarat-syarat yang ditetapkan terutamanya berkenaan kadar faedah maksimum yang dikenakan kepada peminjam bagi mengelakkan peminjam dianiaya dan diperas.
60. PR-1541-L27632
Tuan Haji Mohd Hasnizan bin Harun [Hulu Selangor] minta **MENTERI PERUMAHAN DAN KERAJAAN TEMPATAN** menyatakan langkah yang diambil bagi menangani isu premis kedai terbiar yang telah memberikan kesan negatif kepada persekitaran dan tindakan yang boleh diambil kepada pemilik-pemilik premis tersebut kerana menimbulkan masalah seperti dijadikan tempat pembuangan sampah dan aktiviti-aktiviti tidak sepatutnya.
61. PR-1541-L29098
Dr. Kelvin Yii Lee Wuen [Bandar Kuching] minta **MENTERI KESIHATAN** menyatakan keputusan Kementerian untuk meletakkan profession 'Clinical Psychology' di bawah selian JPA dan bukan di bawah Kementerian Kesihatan (KKM).

62. PR-1541-L28198

Dr. Hajah Halimah Ali [Kapar] minta **MENTERI KESIHATAN** menyatakan:

- (a) perincian jumlah kakitangan mengikut kategori sistem penjagaan Kesihatan (doktor/jururawat/pembantu perubatan) di bawah KKM yang telah meninggalkan perkhidmatan daripada tahun 2020 sehingga kini; dan
- (b) berapa kenaikan jumlah pesakit yang akan terpaksa ditanggung oleh hospital dan klinik kesihatan awam impak peningkatan bayaran premium insurans kesihatan.

63. PR-1541-L28597

Puan Yeo Bee Yin [Puchong] minta **MENTERI KESIHATAN** menyatakan:

- (a) berapa jumlah pegawai perubatan psikiatri dan psikologi di hospital Kerajaan berbanding permintaan. Apakah purata tempoh menunggu untuk mendapat perkhidmatan pakar; dan
- (b) langkah yang diambil oleh Kementerian untuk memastikan kesihatan mental juga dilindungi dalam pakej insurans kesihatan.

64. PR-1541-L27624

Tuan Hassan bin Abdul Karim [Pasir Gudang] minta **MENTERI PERTANIAN DAN KETERJAMINAN MAKANAN** menyatakan bilakah rakyat berpeluang untuk membeli beras putih tempatan dengan mudah seperti tahun-tahun sebelum ini di kedai-kedai dan di pasaraya-pasaraya dengan harga yang lebih murah berbanding harga beras putih import yang mahal.

65. PR-1541-L28550

Tuan Tan Kar Hing [Gopeng] minta **MENTERI PERUMAHAN DAN KERAJAAN TEMPATAN** menyatakan bagaimana pengenalan hukuman khidmat masyarakat dapat dipadukan dengan penggunaan CCTV berasaskan AI dalam usaha mencegah pembuangan sampah haram dan adakah peruntukan ahli Parlimen dapat dimanfaatkan untuk isu ini, seperti mana Gopeng memperkenalkan CCTV AI dalam kawasan.

66. PR-1541-L28322

Tuan Haji Mohd Syahir bin Che Sulaiman [Bachok] minta **MENTERI EKONOMI** menyatakan adakah Kerajaan telah mengadakan proses libat urus dengan pengusaha stesen-stesen minyak di seluruh negara berhubung model pelaksanaan subsidi petrol RON95 secara bersasar serta apakah dapatan utama yang diambil kira oleh pihak Kerajaan.

67. PR-1541-L28391

Datuk Suhaimi bin Nasir [Libaran] minta **MENTERI KESIHATAN** menyatakan mengenai status penyakit HMPV dan apakah tindakan Kementerian bagi memastikan ianya tidak akan menjadi satu ancaman kepada kesihatan negara.

68. PR-1541-L28173

Tuan Haji Bakri bin Jamaluddin [Tangga Batu] minta **MENTERI KESIHATAN** menyatakan adakah Kementerian mempunyai langkah progresif atau kontigensi bagi menangani isu kekurangan ahli fisioterapi yang masih tidak mengikut saranan Pertubuhan Kesihatan Dunia iaitu sekitar 1:2000 penduduk.

69. PR-1541-L28187

Tuan Haji Aminolhuda bin Hassan [Sri Gading] minta **MENTERI PELABURAN, PERDAGANGAN DAN INDUSTRI** menyatakan berdasarkan usaha yang sedang dilakukan oleh MITI bersama Kerajaan Selangor dan Johor untuk memastikan setiap daerah mempunyai pengecas DC untuk kenderaan elektrik. Berapa angka terkini mengenai jumlah pengecas DC yang sudah dipasang di kedua-dua negeri ini.

70. PR-1541-L28444

Tuan Nurul Amin bin Hamid [Padang Terap] minta **MENTERI PERTANIAN DAN KETERJAMINAN MAKANAN** menyatakan langkah yang telah diambil oleh Jawatankuasa Khas yang ditubuhkan oleh Kementerian pada tahun lalu dalam menangani isu beras putih tempatan di negara kita ini.

71. PR-1541-L27807

Tuan Edwin anak Banta [Selangau] minta **MENTERI KERJA RAYA** menyatakan adakah Kementerian mempunyai perancangan untuk menaik taraf Jalan Selangau ke Matadeng (Simpang 4 Mukah) yang banyak berselekoh dan merbahaya kepada pengguna.

72. PR-1541-L28690

Tuan Fathul Huzir bin Ayob [Gerik] minta **MENTERI KERJA RAYA** menyatakan status terkini pemasangan lampu dan baik pulih jalan di jalan utama FT077 Pengkalan Hulu - Betong kerana jalan ini adalah penghubung antarabangsa Malaysia dan Thailand. Kejadian tanah runtuh kerap berlaku di sepanjang jalan ini menyebabkan kesesakan lalu lintas bertambah di waktu puncak.

73. PR-1541-L29074

Tuan Mordi Bimol [Mas Gading] minta **MENTERI KESIHATAN** menyatakan sama ada Kementerian berhadapan dengan krisis kekurangan jururawat dalam sektor awam dan swasta. Apakah statistik terkini jururawat dalam negara serta apakah dengan melonggarkan syarat kemasukan program kejururawatan bagi lepasan SPM berupaya mengatasi masalah tersebut tanpa menjejaskan kualiti latihan.

74. PR-1541-L29082

Tuan Lim Guan Eng [Bagan] minta **MENTERI PERUMAHAN DAN KERAJAAN TEMPATAN** menyatakan sama ada peruntukan untuk pembangunan 452 kampung baharu dan lantikan pegawai pembangunan khususnya akan ditambah serta kemajuan, skop dan jenis projek yang dijalankan dengan berikan pecahan terperinci.

75. PR-1541-L28828

Tuan Chow Yu Hui [Raub] minta **MENTERI KOMUNIKASI** menyatakan sebab Google kini tidak lagi memaparkan kadar tukaran mata wang Ringgit Malaysia (MYR) kepada mata wang asing dan apakah langkah-langkah yang diambil untuk memastikan akses kepada maklumat kadar tukaran mata wang ini dapat diteruskan.

76. PR-1541-L28971

Tuan Roy Angau anak Gingkoi [Lubok Antu] minta **MENTERI KERJA RAYA** menyatakan berapa peratusan pelaksanaan jalan Sabah-Sarawak Link Road Fasa 2 (SSLR 2) setakat ini serta nyatakan tarikh permulaan kerja dan tempoh siap pakej-pakej kerja dalam projek tersebut.

77. PR-1541-L28506

Datuk Seri Dr. Ronald Kiandee [Beluran] minta **MENTERI PERTANIAN DAN KETERJAMINAN MAKANAN** menyatakan langkah strategik yang telah diambil untuk mengurangkan jurang antara import dan eksport agromakanan negara. Apa usaha yang diambil untuk meningkatkan pengeluaran domestik.

78. PR-1541-L28319

Tuan Haji Mohd Syahir bin Che Sulaiman [Bachok] minta **MENTERI EKONOMI** menyatakan langkah Kerajaan dalam memastikan kerjasama lebih erat antara sektor awam dan swasta untuk merancakkan pelaburan domestik dan pembangunan wilayah bagi menyokong pertumbuhan ekonomi pada tahun 2025.

79. PR-1541-L28554

Tuan Tan Kar Hing [Gopeng] minta **MENTERI KERJA RAYA** menyatakan hasil siasatan terhadap kejadian tanah runtuh yang berlaku di 43.4km, Jalan Simpang Pulai-Cameron Highlands dan apakah langkah penilaian keselamatan cerun serta kos dan tindakan pembaikan di lokasi tersebut.

80. PR-1541-L27857

Kapten Azahari bin Hasan [Padang Rengas] minta **MENTERI EKONOMI** menyatakan :

- (a) perincian mekanisme pelaksanaan rasionalisasi RON95 termasuk peringkat '*front-end*' membabitkan operasi stesen minyak dan '*back-end*' bagi penentuan kelayakan golongan B85; dan
- (b) apakah mekanisme kawalan untuk mengelakkan berlakunya keciciran isi rumah atau individu yang layak memandangkan proses penentuan kriteria T15 masih belum dimuktamadkan.

81. PR-1541-L28607

Dato' Seri Hamzah bin Zainudin [Larut] minta **MENTERI EKONOMI** menyatakan pertumbuhan sektor pembuatan negara mengikut suku tahunan 2024 dan bagaimana kadar pertumbuhan sektor pembuatan Malaysia berbanding negara ASEAN lain seperti Thailand, Indonesia, Singapura dan Filipina.

82. PR-1541-L28030

Dato' Wira Dr. Ku Abd Rahman bin Ku Ismail [Kubang Pasu] minta **MENTERI EKONOMI** menyatakan :

- (a) perincian perjanjian JS-SEZ (Johor - Singapore Special Economic Zone) terutamanya *funding obligations* (obligasi kewangan) bagi kedua-dua negara (Malaysia dan Singapura); dan
- (b) bilakah *blueprint* akan dibangunkan bagi menjayakan JS-SEZ.

83. PR-1541-L28392

Datuk Suhaimi bin Nasir [Libaran] minta **MENTERI KOMUNIKASI** menyatakan pelan Kementerian melalui pembangunan infrastruktur digital di Sabah untuk memastikan liputan internet berkelajuan tinggi dapat diperluaskan dan dinikmati oleh rakyat Sabah terutamanya di kawasan Libaran.

84. PR-1541-L28822

Datuk Dr. Ahmad Marzuk bin Shaary [Pengkalan Chepa] minta **MENTERI PERUMAHAN DAN KERAJAAN TEMPATAN** menyatakan :

- (a) langkah yang diambil oleh Kementerian bagi membanteras perniagaan runcit dalam kalangan warga asing; dan
- (b) tindakan Kementerian bagi mengatasi manipulasi perkahwinan dengan wanita tempatan sebagai alat yang membolehkan warga asing membuka perniagaan.

85. PR-1541-L27589

Tuan Kalam bin Salan [Sabak Bernam] minta **MENTERI PERTANIAN DAN KETERJAMINAN MAKANAN** menyatakan apakah penambahbaikan Prosedur Operasi Standard (SOP) pembelian diesel bersubsidi untuk nelayan bagi mengelakkan penyelewengan bahan subsidi tersebut berlaku. Berapa liter diesel diperuntukan untuk ini dan berapa peratus yang telah diselewengkan.

86. PR-1541-L29196

Datuk Seri Panglima Bung Moktar bin Radin [Kinabatangan] minta **MENTERI EKONOMI** menyatakan sama ada Kerajaan bercadang untuk melaksanakan projek Trans-Sabah Gas Pipeline sebagai pemboleh daya untuk mengatasi masalah defisit bekalan elektrik terutamanya di pantai timur Sabah.

87. PR-1541-L29020

Tuan Syed Saddiq bin Syed Abdul Rahman [Muar] minta **MENTERI PERUMAHAN DAN KERAJAAN TEMPATAN** menyatakan langkah proaktif yang diambil bagi membendung kenaikan cukai taksiran yang melampau pada setiap tahun oleh Kerajaan tempatan.

88. PR-1541-L28560

Tan Sri Dato' Haji Mahiaddin bin Haji Mohd. Yassin [Pagoh] minta **MENTERI PELABURAN, PERDAGANGAN DAN INDUSTRI** menyatakan perincian mengenai jumlah peluang pekerjaan baharu yang dijana daripada pelaburan luar mengikut sektor setakat ini, serta strategi terperinci yang digariskan Kerajaan bagi mewujudkan lebih banyak pekerjaan berkemahiran tinggi untuk memenuhi keperluan industri masa depan seperti AI dan teknologi hijau.

89. PR-1541-L28941

Datuk Haji Ahmad Amzad bin Mohamed @ Hashim [Kuala Terengganu] minta **MENTERI PELABURAN, PERDAGANGAN DAN INDUSTRI** menyatakan sektor-sektor utama yang akan diberi keutamaan di bawah NIMP tahun ini dan bagaimana Kerajaan memastikan sektor ini menerima sokongan yang mencukupi dari segi dasar, infrastruktur dan modal.

90. PR-1541-L27880

Dato' Dr. Haji Alias bin Razak [Kuala Nerus] minta **MENTERI KESIHATAN** menyatakan :

- (a) status siasatan penipuan panel pengamal am (GP) di bawah Skim Perubatan Madani (SPM) yang telah memberi kesan langsung terhadap kemampanan skim tersebut; dan
- (b) perancangan Kementerian untuk mengetatkan prosedur operasi standard (SOP) tuntutan (*claim*) yang dikemukakan oleh GP bagi menangani isu penipuan tuntutan skim ini.

91. PR-1541-L27802

Dato' Indera Mohd Shahar bin Abdullah [Paya Besar] minta **MENTERI KESIHATAN** menyatakan :

- (a) bilangan individu yang menghentikan langganan premium insurans kesihatan susulan kenaikan harga bermula 2020 hingga 2025; dan
- (b) intervensi jangka panjang memastikan kemampanan perkhidmatan kesihatan awam akibat perkhidmatan swasta menjadi lebih eksklusif dan pertambahan populasi menua.

92. PR-1541-L27643

Dato' Sri Sh Mohmed Puzi bin Sh Ali [Pekan] minta **MENTERI KERJA RAYA** menyatakan inisiatif Kementerian bersama agensi atau pihak yang berkaitan dalam melaksanakan pemasangan lampu solar di sepanjang lebuh raya yang kerap menjadi lokasi kemalangan disebabkan keadaan jalan yang terlalu gelap pada waktu malam sehingga menjejaskan tahap pemanduan.

93. PR-1541-L28932

Dato' Seri Dr. Shahidan bin Kasim [Arau] minta **MENTERI KOMUNIKASI** menyatakan :

- (a) kriteria yang dilihat oleh Kerajaan dalam pemberian tender rangkaian 5G kepada syarikat U Mobile; dan
- (b) adakah Kerajaan bercadang untuk merombak semula keputusan pemberian tender rangkaian 5G kepada U Mobile sebaliknya memberi kepada semua syarikat telekomunikasi terkemuka.

94. PR-1541-L28981

Dato' Hajah Siti Zailah binti Mohd Yusoff [Rantau Panjang] minta **MENTERI PERTANIAN DAN KETERJAMINAN MAKANAN** menyatakan langkah drastik Kementerian untuk menangani masalah kekurangan beras tempatan di pasaran serta menjamin keterjaminan makanan negara.

95. PR-1541-L29180

Dato' Syed Abu Hussin bin Hafiz Syed Abdul Fasal [Bukit Gantang] minta **MENTERI PERTANIAN DAN KETERJAMINAN MAKANAN** menyatakan langkah Kementerian dalam menggalakkan lebih ramai usahawan muda dalam bidang agrokeusahawanan bagi memenuhi hasrat negara memajukan sektor pertanian yang menyumbang kepada bekalan makanan negara.

ATURAN URUSAN MESYUARAT DAN USUL-USUL

1. **Dato' Indera Mohd Shahar bin Abdullah [Paya Besar]** akan mencadangkan :

“Bahawa suatu ucapan yang tidak sepatutnya dipersembahkan kepada Kebawah Duli Yang Maha Mulia Seri Paduka Baginda Yang di-Pertuan Agong, demikian bunyinya :

“Ampun Tuanku,

Patik, Yang di-Pertua dan Ahli-ahli Dewan Rakyat Malaysia di dalam Persidangan Parlimen, memohon ampun mempersembahkan suatu ucapan yang ikhlas daripada Majlis Dewan Rakyat mengucapkan berbanyak-banyak syukur dan menjunjung kasih Titah Ucapan Kebawah Duli Yang Maha Mulia Seri Paduka Baginda Yang di-Pertuan Agong semasa membuka Penggal Keempat, Parlimen Yang Kelima Belas.””

Menyambung semula perbahasan atas masalah (18 Februari 2025)

- | | | | |
|----|-----------------|--|-------------------------------|
| 2. | (D.R.62/2024) | Rang Undang-Undang BERNAMA (Pindaan) 2024. | Bacaan Kali Yang Kedua |
| | | [Menteri Komunikasi] | |
| 3. | (D.R.63/2024) | Rang Undang-Undang Majlis Media Malaysia 2024. | “ |
| | | [Menteri Komunikasi] | |
| 4. | (D.R.19/2024) | Rang Undang-Undang Mufti (Wilayah-Wilayah Persekutuan) 2024. | “ |
| | | [Perdana Menteri] | |
| 5. | (D.R.47/2024) | Rang Undang-Undang Suruhanjaya Komunikasi dan Multimedia Malaysia (Pindaan) 2024 - Menyambung semula perbahasan atas masalah “Bahawa Rang Undang-Undang ini dibacakan kali yang kedua sekarang,” (10 Disember 2024) | |
| | | [Menteri Komunikasi] | |

6. PR-1541-U(27)369

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk merangka dan membentangkan sebuah perancangan jangka masa panjang untuk 30 tahun ke hadapan dalam mencorak masa depan dan hala tuju negara di mana setiap Rancangan Malaysia 10 tahun, lima tahun dan belanjawan negara akan diselaraskan berpandukan perancangan tersebut.

Walaupun terdapat dasar sedia ada, tetapi perancangan ini tidak cukup kukuh untuk merancang secara holistik dan menyelesaikan '*complexity*' kerana tempoh adalah singkat dan sederhana. Kerajaan boleh mencontohi negara serantau dengan menyelaraskan rancangan 5 tahun dengan strategi jangka panjang, di mana setiap pelan dan dasar harus selari dengan visi jangka panjang.

Penjajaran strategik ini akan meningkatkan daya tahan negara dan meletakkan Malaysia sebagai pemain berdaya saing di peringkat global. Setiap RMK seharusnya berfungsi sebagai batu loncatan untuk mencapai wawasan keseluruhan, membolehkan peruntukan sumber yang lebih berkesan dan responsif kepada cabaran yang muncul."

[Menteri Ekonomi]

7. PR-1541-U(27)370

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk menubuhkan jawatankuasa khas yang terdiri daripada pelbagai Kementerian untuk mengkaji mekanisme memastikan kemampanan sistem penjagaan kesihatan dalam negara.

Perkhidmatan kesihatan awam, yang sudah mengalami tekanan seperti peningkatan permintaan, had kewangan dan ketidaksamaan dalam akses kepada penjagaan. Jawatankuasa khas merentas Kementerian berperanan menangani kebimbangan ini dan meneroka mekanisme pembiayaan yang inovatif dan inklusif.

Dengan mengutamakan kemampanan penjagaan kesihatan, kita boleh memastikan penjagaan kesihatan yang berkualiti kekal dapat diakses oleh semua rakyat, tanpa mengira status kewangan mereka, di samping mengurangkan beban kewangan kepada Kerajaan."

[Menteri Kesihatan]

8. PR-1541-U(27)371

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk mengorientasikan semula dasar penyelidikan dan pembangunan (R&D) untuk memupuk inovasi yang lebih besar dalam syarikat dengan meningkatkan kerjasama dengan universiti.

Dengan mewujudkan hubungan yang lebih kukuh antara penyelidikan akademik dan industri, matlamatnya adalah untuk memacu lebih banyak inovasi yang dikomersialkan yang boleh bersaing di peringkat global.

Pada masa yang sama, Kerajaan perlu meningkatkan fungsi institusi penyelidikan Kerajaan dengan memudahkan pemindahan teknologi global dan membantu syarikat tempatan memanfaatkan teknologi termaju.

Dengan menyediakan akses kepada sumber teknologi sedia ada, Kerajaan membolehkan syarikat memanfaatkan inovasi ini untuk pembangunan produk dan pertumbuhan perniagaan, akhirnya meningkatkan kelebihan daya saing Malaysia dalam pasaran global."

[Menteri Sains, Teknologi dan Inovasi]

9. PR-1541-U(27)372

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan kertas putih strategi jangka pendek, sederhana dan panjang bagi menguatkuasakan peraturan yang lebih ketat mengenai penyelenggaraan kenderaan dan keselamatan muatan, meningkatkan pemeriksaan, dan mengenakan penalti yang lebih tinggi bagi pelanggaran peraturan jalan raya.

Statistik menunjukkan 825 kenderaan berat terlibat dalam kemalangan maut dalam tempoh sepuluh bulan pertama tahun ini, menyumbang kepada sebahagian besar daripada 17,905 kemalangan maut.

Latihan tetap untuk pemandu kenderaan berat, ditambah dengan keperluan pelesenan yang dipertingkatkan, akan memastikan amalan keselamatan jalan raya yang lebih baik. Pelaburan dalam infrastruktur dan teknologi jalan raya, seperti sistem keselamatan dalam trak, juga penting untuk meminimumkan risiko. Kempen kesedaran awam dan pengumpulan data yang lebih baik boleh menyasarkan lagi tempoh berisiko tinggi, seperti musim perayaan, untuk mencegah kemalangan dan meningkatkan keselamatan jalan raya secara keseluruhan."

[Menteri Pengangkutan]

10. PR-1541-U(27)384

Dato' Seri Dr. Shahidan bin Kasim [Arau] akan mencadangkan :

“Bahawa Dewan Rakyat ini menggesa Kerajaan supaya mewujudkan pusat benih padi khusus di kawasan utara khususnya di Arau, Perlis bagi membekalkan benih-benih padi yang bermutu tinggi dan membolehkan penyelidikan yang agresif dibuat bagi menghasilkan benih padi baru di samping menyelesaikan masalah ketidakcukupan benih padi di pasaran. Pusat Benih Padi adalah penting untuk mengumpul benih padi yang lebih berdaya komersial, lebih berdaya tahan iklim (*climate resistant*) dan sesuai dengan cuaca di kawasan utara Semenanjung Malaysia.

Pusat ini juga boleh berperanan menjalankan kajian di peringkat serantau dan melibatkan penyelidik daripada negara-negara jiran seperti Thailand, Indonesia dan Myanmar yang mempunyai tanaman baka padi yang berdaya komersial tinggi. Memohon pihak Kerajaan mengambil tindakan dengan kadar segera.”

[Menteri Pertanian dan Keterjaminan Makanan]

11. PR-1541-U(27)385

Dato' Seri Dr. Shahidan bin Kasim [Arau] akan mencadangkan :

“Bahawa Dewan Rakyat ini menggesa supaya Kerajaan mengambil langkah proaktif dalam menangani kes penderaan kanak-kanak yang berlarutan dan sehingga kini belum ada penyelesaian tuntas. Statistik Kementerian Pembangunan Wanita, Keluarga dan Masyarakat menunjukkan sehingga November 2023, kira-kira 1,069 kes penderaan kanak-kanak dilaporkan yang disebabkan oleh kecuaian ibu bapa dan penjaga.

Kanak-kanak adalah masa depan negara. Usaha menangani isu pengabaian dan penderaan kanak-kanak yang dilihat membimbangkan perlu ditangani secara menyeluruh dan membabitkan pelbagai pihak.

Lantaran itu, pihak Kerajaan wajar menangani pantas menghentikan kitaran dera ini dengan target ‘Dera Sifar’ menerusi langkah-langkah proaktif seperti mewajibkan kursus penjagaan anak, mewujudkan sistem pemantauan berkala serta meneliti semula undang-undang serta garis panduan yang berkaitan. Perkhidmatan dalam hal membabitkan perlindungan, pemulihan dan pemeliharaan kanak-kanak perlu diperkukuh dan direalisasikan. Memohon pihak Kerajaan mengambil tindakan dengan kadar segera.”

[Menteri Dalam Negeri]

12. PR-1541-U(27)386

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan menubuhkan badan siasatan bebas bagi mengenal pasti secara terperinci punca utama yang menyebabkan kekurangan bekalan makanan asas seperti beras tempatan, ayam dan telur ayam di pasaran.

Perancangan penyelesaian jangka pendek, jangka panjang yang komprehensif serta penguatkuasaan yang lebih 'keras' terhadap golongan kartel orang tengah antara faktor pengukuhan daya pengeluaran bekalan makanan. Rakyat baik dari kalangan pengguna mahupun pengusaha restoran kecil masih mengeluh dengan permasalahan ini yang menyebabkan kenaikan harga bekalan makanan.

Kerajaan tidak seharusnya melepaskan tanggungjawab menjaga keterjaminan bekalan makanan kepada pengguna sebagai *end user* mahupun menyarankan penyelesaian jalan mudah seperti menambah import makanan tetapi perlu mencari penyelesaian sepanjang rangkaian jaringan bekalan bahan makanan mentah bagi memastikan keterjaminan makanan (*food security*). Memohon pihak Kerajaan mengambil tindakan dengan kadar segera."

[Menteri Pertanian dan Keterjaminan Makanan]

13. PR-1541-U(27)387

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji semula peruntukan khas yang boleh diberikan kepada pekebun kecil, penternak dan nelayan yang terjejas akibat situasi iklim yang tidak menentu serta kenaikan harga barang. Kerosakan tanaman dan kematian ternakan sering kali mendatangkan kerugian besar hingga jutaan ringgit setiap kali berlaku bencana alam.

Dengan situasi semasa ekonomi negara yang tidak stabil juga secara tidak langsung akan memberi tekanan kepada kos sara hidup pekebun kecil, penternak dan nelayan yang kebanyakannya bergantung harap kepada sumber pendapatan tersebut sahaja. Maka pemberian peruntukan khas ini dapat menambah baik kehidupan mereka. Memohon pihak kerajaan mengambil tindakan dengan kadar segera."

[Menteri Pertanian dan Keterjaminan Makanan]

14. PR-1541-U(27)388

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya menyegerakan pembinaan dan baik pulih tembok sempadan Malaysia-Thailand supaya merangkumi keseluruhan perbatasan dari Perlis hingga Kelantan dan menyediakan suatu pelan tindakan komprehensif merangkumi semua agensi Kerajaan bagi kawalan sempadan Malaysia-Thailand. Sempadan Malaysia-Thailand adalah sepanjang kira-kira 656km namun hanya 111 km sahaja yang berpagar. Sebahagian tembok sempadan antara Malaysia dan Thailand di sepanjang Laluan Keselamatan dan Pembangunan (KESBAN) dilihat sudah usang manakala peralatan kamera litar tertutup (CCTV) dan alat pengimbas perlu ditambah, dibaik pulih dan dinaik taraf dengan teknologi terkini seperti penggunaan dron.

Beberapa insiden pada masa lalu seperti kes tembakan ke atas pasukan keselamatan negara dan bermaharajalelanya sindiket pemerdagangan manusia seperti yang berlaku di insiden Wang Kelian serta penyeludupan barangan termasuk dadah dan senjata menunjukkan betapa kritikalnya keperluan untuk meningkatkan tahap keselamatan di perbatasan.

Kerajaan Malaysia sebelum ini telah memberikan komitmen untuk membina tembok sempadan tersebut tetapi sehingga terkini masih tiada pelan pembangunan komprehensif dan terperinci yang diumumkan.

Mohon pihak Kerajaan memandang serius perkara ini dengan menyegerakan pembangunan tembok sempadan Malaysia-Thailand secara menyeluruh dan memastikan suatu pelan komprehensif merangkumi semua agensi Kerajaan bagi kawalan sempadan Malaysia-Thailand agar benar-benar berkesan menjamin keselamatan perbatasan negara. Memohon pihak Kerajaan mengambil tindakan dengan kadar segera."

[Perdana Menteri]

15. PR-1541-U(27)389

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya agihan peruntukan pembangunan dan pelaksanaan projek pembangunan di peringkat negeri diberikan mengikut keutamaan dan keperluan Kerajaan Negeri. Berdasarkan pelan RMKe-12, enam negeri kurang membangun akan terus diberi keutamaan dengan agihan sekurang-kurangnya 50% daripada keseluruhan peruntukan Perbelanjaan Pembangunan Asas Persekutuan.

Namun begitu, terdapat beberapa projek yang diluluskan oleh Kerajaan Persekutuan tidak mengambil kira cadangan dan hasrat Kerajaan negeri khususnya di Perlis untuk mempelbagaikan fungsi sesuatu projek sedangkan Kerajaan negeri mempunyai dasar serta hala tuju yang telah mengambil kira pelbagai keperluan dan kehendak semasa serta pada masa hadapan. Misalnya, Projek Lencongan Banjir Barat Timah Tasoh yang telah dilaksanakan pada tahun 2015, di mana dalam pembinaan terowong banjir terdapat skop pembinaan pada item pencahayaan di dalam terowong berjumlah RM300 ribu.

Namun, skop berkenaan telah dikeluarkan atas alasan penjimatan. JPS Perlis selaku pelaksana projek telah membangkitkan perkara ini supaya dikekalkan atas faktor keselamatan dan memudahkan kerja pemantauan serta penyelenggaraan di dalam terowong di masa hadapan. Akan tetapi, ianya masih tetap dikeluarkan daripada skop asal projek. Memohon pihak Kerajaan mengambil tindakan dengan kadar segera."

[Menteri Ekonomi]

16. PR-1541-U(27)390

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji dan merancang satu inisiatif khas bagi memastikan setiap rakyat dan keluarga Malaysia terutamanya dari golongan B40 dan M40 mampu memiliki kediaman pertama dengan menyediakan rumah mampu milik berharga RM200,000 dan ke bawah baik di luar dan di dalam bandar. Kerajaan tidak boleh hanya memperkenalkan inisiatif yang hanya sekadar *rebranding* daripada Kerajaan sebelum ini kerana perubahan yang besar perlu dilakukan bagi mendepani kenaikan kos pembinaan disebabkan kenaikan harga barang binaan.

Dasar Perumahan Negara (2018-2025) sendiri memperakui bahawa isu kemampuan memiliki rumah semakin ketara di kalangan rakyat dan impak kenaikan harga rumah yang mendadak turut dirasai golongan M40 selain B40. Inisiatif khas untuk menyediakan kemudahan rumah pertama pada harga di bawah RM200,000 dan ke bawah ini hendaklah dijadikan salah satu sasaran kajian semula Dasar Perumahan Negara dan memerlukan input dari pelbagai agensi dan Kementerian serta pihak bukan Kerajaan dan bukan dari satu Kementerian sahaja.

Isu kemampuan memiliki rumah pertama jika tidak ditangani akan mewujudkan generasi rakyat yang sentiasa menyewa tanpa mendapat peluang memiliki perumahan sendiri. Golongan generasi ini juga akan terus menjadi mangsa kepada harga hartanah yang melambung akibat spekulasi hartanah dan tanpa kawalan harga sehingga menjadikan harga di luar kemampuan sebenar golongan M40 dan B40. Memohon pihak Kerajaan mengambil tindakan dengan kadar segera."

[Menteri Perumahan dan Kerajaan Tempatan]

17. PR-1541-U(27)391

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan bersikap adil dalam mengamalkan kebebasan media di Malaysia. Kerajaan tidak seharusnya menjadikan Suruhanjaya Komunikasi Multimedia Malaysia (SKMM) sebagai alat politik untuk menyekat mana-mana isi kandungan media yang tidak '*pro*' Kerajaan atau tidak sependapat dengan Kerajaan. YAB Perdana Menteri yang memerintah Kerajaan pada masa ini telah berikrar dalam manifestonya untuk memastikan hak kebebasan bersuara dan melindungi kebebasan media.

Namun, keadaan sebaliknya berlaku selepas beberapa bulan beliau membentuk Kerajaan. Lebih mendukacitakan, kebebasan media yang diwar-warkan Kerajaan hanyalah terhad kepada '*pro*' Kerajaan sahaja, manakala parti pembangkang secara halus dikenakan sekatan kepada akses media. Mana-mana media rasmi Kerajaan mahupun swasta tidak diberi kebenaran untuk menyiarkan berita mengenai parti pembangkang mahupun pihak yang menentang Kerajaan.

Oleh hal demikian, Kerajaan digesa supaya berlaku adil dalam menyalurkan maklumat kepada rakyat. Tindakan ini adalah penting untuk memastikan hak kebebasan media tidak dicabul sewenang-wenangnya oleh pihak-pihak tertentu. Memohon pihak Kerajaan mengambil tindakan dengan kadar segera."

[Menteri Komunikasi]

18. PR-1541-U(27)392

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan mengkaji semula kawasan masuk dan keluar sempadan Malaysia-Thailand di Wang Kelian, Perlis. Sebelum ini, penduduk kedua-dua negara boleh menikmati kemudahan bergerak sehingga dua kilometer tanpa menggunakan pasport atau pas sempadan pada hari minggu.

Kuatkuasa itu pernah dibuat bermula tahun 1993 hingga 2015. Akan tetapi, penarikan semula kemudahan kebebasan bergerak ini telah dibuat pada tahun 2015 kerana penemuan rangka manusia mangsa sindiket perdagangan manusia yang dipercayai etnik Rohingya.

Susulan itu, Wang Kelian menjadi pekan mati hingga kini. Kerajaan Negeri Perlis cuba membangunkan semula kawasan pelancongan di Wang Kelian, namun ianya tidak semeriah dahulu.

Justeru itu, Kerajaan diharapkan dapat mengkaji dan mempertimbangkan semula untuk memberi kemudahan bergerak di antara kedua-dua negara seperti sebelum ini. Dengan

kemudahan tersebut, ianya akan dapat menjana semula perkembangan ekonomi khususnya buat penduduk tempatan yang sebelum ini amat rancak sebelum ditutup sepenuhnya pada tahun 2015. Semasa adanya '*Free Flow*' ini, Wang Kelian merupakan satu destinasi pelancongan yang amat meriah dan telah memberi ruang kepada peniaga-peniaga kecil di Perlis dan juga Selatan Thailand menambahkan pendapatan mereka. Memohon pihak Kerajaan mengambil tindakan dengan kadar segera."

[Menteri Dalam Negeri]

19. PR-1541-U(27)393

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan mengkaji semula dasar sedia ada yang berkaitan Warisan Arkeologi Negara dan merangka satu pelan tindakan khusus bagi memartabatkan Warisan Arkeologi Negara yang ditemukan. Penemuan-penemuan arkeologi seperti artifak tembikar, seramik, lukisan purba, rangka manusia purba dan lain-lain artifak amat penting untuk dihayati dan dipelajari kerana data yang dihasilkan dapat membantu merungkai persoalan-persoalan tentang perkembangan hidup dan tamadun manusia silam.

Malahan, ia juga boleh dijadikan sebagai salah satu sumber rujukan pensejarahan negara yang utama. Akan tetapi masih banyak lagi tapak- tapak penemuan arkeologi yang ditemukan tidak dikaji sepenuhnya kerana beberapa faktor terutamanya kekangan kewangan hingga menyebabkan kebanyakan tapak tersebut ditinggalkan tanpa sebarang kajian menyeluruh mahupun pemeliharaan khusus.

Oleh yang demikian, Kerajaan melalui Kementerian Pelancongan, Seni dan Budaya (MOTAC) wajar mengkaji dan merangka satu pelan tindakan bagi memartabatkan Warisan Arkeologi Negara yang ditemukan supaya tapak-tapak arkeologi tersebut dapat dijadikan sebagai subjek kebanggaan dan identiti negara yang berbilang kaum dan agama yang boleh dihayati dan diambil iktibar.

MOTAC amnya boleh mengambil contoh kerangka tindakan daripada negara lain seperti China, Korea, Jepun dan Turki tentang kaedah-kaedah kajian, pemeliharaan dan pemuliharaan yang telah mereka berjaya lakukan melalui kerjasama strategik antara negara.

Hal ini juga sekaligus akan dapat menangani isu kemerosotan minat generasi muda terhadap Sejarah kerana generasi ini dilihat lebih cenderung untuk mengikuti perkembangan teknologi digital dan hiburan. Pembentukan generasi muda yang bakal menjadi pemimpin negara amat penting melalui pendekatan sejarah ini agar semangat kenegaraan atau cinta akan negara itu dapat dipupuk sebaiknya. Memohon pihak Kerajaan mengambil tindakan dengan kadar segera."

[Menteri Pelancongan, Seni dan Budaya]

20. PR-1541-U(27)394

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan menyegerakan kelulusan dan penyaluran peruntukan pembangunan infrastruktur dan kemudahan terutamanya melibatkan penurapan tar di jalan-jalan yang menghubungkan laluan ke perkampungan Orang Asli dan memperbanyakkan pemasangan lampu jalan di Nenggiri, Kelantan.

Dalam Pilihan Raya Kecil (PRK) Dun Nenggiri baru-baru ini, pihak Kerajaan telah mengetahui bahawa kawasan tersebut memerlukan peruntukan pembangunan infrastruktur dan kemudahan yang menyeluruh khususnya di kawasan perkampungan Orang Asli seperti Pos Gob, Pos Tohoi, Pos Simpor dan Pos Pasik.

Oleh yang demikian, Kerajaan melalui Kementerian Kemajuan Desa dan Wilayah (KKDW) wajar mengambil perhatian dan tindakan segera terhadap kekurangan infrastruktur dan kemudahan di kawasan perkampungan Orang Asli di Nenggiri Kelantan kerana mereka juga adalah sebahagian daripada rakyat negara ini yang mempunyai hak untuk menikmati segala kemudahan yang disediakan kerajaan. Memohon pihak Kerajaan mengambil tindakan dengan kadar segera."

[Menteri Kemajuan Desa dan Wilayah]

21. PR-1541-U(27)395

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan Persekutuan melaksanakan pembayaran royalti petroleum kepada negeri Terengganu dan Kelantan sebagai komitmen dalam memastikan pengagihan hasil petroleum yang adil dan saksama.

Tuntutan ini adalah selaras dengan hak rakyat dan negeri sebagaimana termaktub dalam Akta Kemajuan Petroleum 1974. Kedudukan pelantar minyak juga bersetentang dengan kawasan perairan negeri Terengganu dan Kelantan. Prinsip Federalisme perlu dihormati dan dipatuhi Kerajaan Persekutuan dengan menunaikan hak yang dituntut oleh rakyat di kedua-dua negeri tersebut. Memohon pihak Kerajaan mengambil tindakan dengan kadar segera."

[Menteri Kewangan]

22. PR-1541-U(27)396

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan Persekutuan melaksanakan pembayaran Wang Ehsan kepada negeri-negeri di bawah pentadbiran Pembangkang. Pembangunan seimbang antara wilayah amat penting agar rakyat menikmati kemudahan infrastruktur dan kemudahan yang setara. Bantuan Wang Ehsan ini akan dapat membantu negeri-negeri tersebut melaksanakan agenda pembangunan dan kesejahteraan rakyat amnya. Memohon pihak Kerajaan mengambil tindakan dengan kadar segera."

[Perdana Menteri]

23. PR-1541-U(27)397

Dato' Seri Dr. Shahidan bin Kasim [Arau] akan mencadangkan :

"Bahawa Dewan ini menggesa Kerajaan Persekutuan memberikan sepenuh perhatian kepada Beting Patinggi Ali, yang juga dikenali sebagai Luconia Shoals, terletak di perairan Sarawak dan merupakan sebahagian daripada Zon Ekonomi Eksklusif (EEZ) Malaysia. Isu pencerobohan oleh kapal dan pesawat asing, terutamanya dari China telah menjadi persoalan rakyat memandangkan ia berkaitan dengan kedaulatan negara dan kepentingan awam. Sejak tahun 2013, Malaysia telah melaporkan pencerobohan berulang oleh kapal Pengawal Pantai China (CCG) di kawasan ini. Tuntutan China terhadap Beting Patinggi Ali dianggap tidak berasas kerana lokasi geografi kawasan tersebut yang lebih dekat dengan pantai Malaysia (84 nautica miles dari Miri) berbanding dengan tanah besar China (sekitar 1000 nautica miles).

Walaupun Malaysia menganggap Beting Patinggi Ali sebagai miliknya, Kerajaan masih berpendirian terdapat tuntutan bertindih dengan China. China menuntut sebagian besar wilayah di Laut China Selatan berdasarkan garis sembilan dash yang mereka tetapkan, yang telah ditolak oleh Mahkamah Permahan Tetap (PCA) pada tahun 2016. Keputusan PCA ini memberikan Malaysia posisi yang lebih kuat untuk menegaskan haknya di kawasan tersebut.

Untuk memastikan kedaulatan ke atas Beting Patinggi Ali, Malaysia perlu meningkatkan lagi kehadiran aset ketenteraan di kawasan tersebut bagi mengukuhkan tuntutan negara terhadap pulau tersebut dan mempergiatkan keberadaan Malaysia di pulau berkenaan. Mohon kerajaan untuk lebih tegas dalam pendiriannya di mana isu Beting Patinggi Ali adalah hak mutlak Malaysia sepertimana termaktub dalam Konvensi Bangsa-Bangsa Bersatu tentang Hukum Laut (UNCLOS) dan bukannya tuntutan bertindih dengan mana-mana negara asing. Memohon pihak Kerajaan mengambil tindakan dengan kadar segera."

[Menteri Pertahanan]

24. PR-1541-U(27)398

Dato' Seri Dr. Shahidan bin Kasim [Arau] akan mencadangkan :

"Bahawa Dewan ini menggesa Kerajaan Persekutuan memberikan hak royalti kepada negeri Kelantan yang tidak dibayar oleh Kerajaan Persekutuan sering kali menjadi perdebatan hangat, terutamanya berkaitan dengan alasan "lebih 3 batu nautika". Kelantan, sebagai salah satu negeri pengeluar minyak di Malaysia, telah lama menuntut hak royalti minyak yang sepatutnya diterima. Namun, Kerajaan Persekutuan berpendapat bahawa Kelantan tidak layak menerima royalti tersebut kerana kedudukan telaga minyak yang terletak lebih dari tiga batu nautika dari pesisir pantai negeri tersebut.

Kerajaan Persekutuan perlu menyemak atau meminda kembali istilah "tiga batu nautika" yang tidak pernah dinyatakan dalam perjanjian asal dengan Petronas. Berpendapat bahawa Akta 144 tidak menetapkan jarak tertentu untuk hak milik telaga minyak. Tambahan lagi, Telaga minyak yang dimiliki Kelantan terletak kira-kira 80 batu nautika dari pesisir pantai, dan terdapat dakwaan bahawa telaga-telaga ini berada dalam kawasan yang dipertikaikan antara Kelantan dan Terengganu. Ini menimbulkan persoalan mengenai keadilan dan keseragaman dalam pembayaran royalti, terutama apabila negeri-negeri lain seperti Terengganu menerima royalti walaupun telaga mereka juga terletak jauh dari pantai.

Dicadangkan penubuhan jawatankuasa bebas yang terdiri daripada wakil Kerajaan negeri, Kerajaan Persekutuan dan pakar undang-undang untuk meneliti semula perjanjian royalti dan isu-isu berkaitan. Ini dapat memastikan bahawa semua pihak terlibat dalam proses perbincangan yang adil dan terbuka serta mencari penyelesaian yang memuaskan kedua-dua belah pihak. Memohon pihak Kerajaan mengambil tindakan dengan kadar segera."

[Menteri Kewangan]

25. PR-1541-U(27)399

Dato' Seri Dr. Shahidan bin Kasim [Arau] akan mencadangkan :

"Bahawa Dewan ini menggesa Kerajaan Persekutuan untuk mempertimbangkan pembinaan jalan sempadan antara Malaysia dan Indonesia, khususnya di kawasan Sabah dan Kalimantan ini adalah penting untuk pelbagai aspek yang melibatkan ekonomi, keselamatan, dan pembangunan infrastruktur yang akan memulangkan hasil lumayan kepada Malaysia. Didapati bahawa jalan sempadan Malaysia – Indonesia ini akan meningkatkan kebolehpasaran antara kedua-dua negara, memudahkan pergerakan barang dan perkhidmatan. Ini akan merangsang aktiviti ekonomi di kawasan sempadan seperti Kalabakan dan Serudong, serta meningkatkan peluang perniagaan bagi penduduk tempatan.

Diingatkan, dengan pemindahan ibu negara Indonesia ke Kalimantan Timur (Nusantara), terdapat potensi besar untuk pertumbuhan ekonomi di kawasan sempadan. Pembinaan jalan akan membolehkan Sabah memanfaatkan perkembangan ini dengan lebih baik, termasuk dalam sektor pelancongan dan perdagangan rentas sempadan. Jalan sempadan ini dapat menghubungkan kampung-kampung pedalaman dengan bandar-bandar utama, memudahkan akses kepada pendidikan, kesihatan, dan peluang pekerjaan bagi penduduk di kawasan terpencil.

Pembinaan jalan sempadan Malaysia – Indonesia juga berpotensi memperkukuhkan hubungan sosial dan budaya antara masyarakat di kedua-dua negara. Ini termasuk pertukaran budaya melalui pelbagai aktiviti sosial dan ekonomi yang dapat dijalankan lebih mudah dengan adanya infrastruktur yang baik. Memohon pihak Kerajaan mengambil tindakan dengan kadar segera."

[Perdana Menteri]

26. PR-1541-U(27)376

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk segera memperbaharui dasar insentif kenderaan diesel komersial menerusi penetapan piawaian Euro 5 sebagai keperluan minimum menjelang tahun 2026 bagi menggalakkan peralihan yang lebih pantas terhadap penggunaan teknologi rendah emisi dan secara tidak langsung menyumbang sebagai penyelesaian jangka panjang dalam menjaga kualiti udara negara.

Pada ketika ini, negara-negara jiran telah mula mengorak langkah lebih ke hadapan seperti Singapura yang telah lama beralih kepada penggunaan Euro 6 dan Thailand yang menerapkan Euro 5 sebagai piawaian minimum sedangkan Malaysia hanya melaksanakan piawaian Euro 4 mulai Januari 2025 dengan pemberian insentif 50 peratus kepada semua kenderaan yang memenuhi piawaian tersebut.

Ketinggalan ini ternyata menjejaskan daya saing Malaysia di peringkat serantau di samping meningkatkan risiko kesihatan sejagat akibat pelepasan nitrogen oksida dan zarah halus.

Kerajaan wajar mempercepatkan peralihan ini bagi memastikan pengurangan pelepasan bahan pencemar selaras dengan Peraturan-Peraturan Kualiti Alam Sekeliling (Kawalan Kandungan Bahan Api Petrol dan Diesel) 2007. Penguatkuasaan yang ketat dan sokongan infrastruktur yang lebih baik menerusi kerjasama rapat Kerajaan bersama pemain industri perlu disinergikan untuk memastikan peralihan ini kelak berjalan lancar."

[Menteri Sumber Asli dan Kelestarian Alam]

27. PR-1541-U(27)377

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk segera mengkaji semula kadar pelepasan cukai untuk individu dan tanggungan yang kini masih berjumlah RM9,000 dan tidak pernah disemak sejak tahun 2010.

Setelah 15 tahun berlalu, inflasi telah meningkat dengan ketara dan amaun tersebut tidak lagi realistik jika dibandingkan kos sara hidup pada hari ini. Atas pertimbangan tersebut, Kerajaan wajar menaikkan amaun pelepasan diri dan tanggungan ke RM12,000 yang bersamaan dengan RM1,000 setiap bulan, bagi menggambarkan senario serta realiti sebenar kehidupan rakyat Malaysia pada hari ini.

Malah dengan peningkatan amaun pelepasan cukai untuk individu dan tanggungan ini secara tidak langsung akan membantu golongan B40 dan M40 yang amat terkesan dengan inflasi dan seterusnya mencerminkan keprihatinan Kerajaan dalam mengurangkan beban rakyat."

[Menteri Kewangan]

28. PR-1541-U(27)378

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk memartabatkan pengamalan Rukun Negara dalam menjadi tonggak identiti, perpaduan dan keutuhan rakyat Malaysia.

Mutakhir ini, negara disajikan dengan berita dan laporan mengenai kes- kes penyebaran ucapan kebencian, penghinaan dan provokasi yang berbaur perkauman, ketegangan kaum, penipuan dan penegasan unsur- unsur subversif yang berpotensi mencetuskan ketegangan antara kaum dan agama di Malaysia menerusi pengguna di platform media sosial.

Media sosial hari ini juga kian dipenuhi dengan lambakan sikap ketidaksopanan dan kebiadaban dalam perbincangan sehingga menjadi seperti satu kelaziman untuk para pengguna media sosial menggunakan bahasa kasar, lucah malah menyerang peribadi antara satu sama lain sehingga mengabaikan nilai kesopanan.

Hal ini mencerminkan kelemahan penghayatan nilai serta elemen Rukun Negara itu sendiri dalam kalangan rakyat Malaysia dan justeru itu, menjadi tanggungjawab Kerajaan untuk mewujudkan sebuah mekanisme yang lebih berkesan dalam menyuburkan pembudayaan setiap prinsip yang terkandung di dalam Rukun Negara sebagai penawar bagi menangani gejala kebejatan akhlak sebegini di platform media sosial. "

[Menteri Perpaduan Negara]

29. PR-1541-U(27)379

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk mengkaji semula cukai korporat Malaysia yang sehingga kini adalah antara yang tertinggi di Asia Tenggara iaitu sebanyak 24 peratus berbanding negara-negara jiran lain seperti, Singapura (17 peratus), Brunei (18.5 peratus), Cambodia (20 peratus), Vietnam (20 peratus), Thailand (20 peratus), dan Indonesia sekitar 21 peratus.

Perbandingan ini semakin jelas jika dilihat dengan situasi kadar cukai Amerika Syarikat (AS). Pada tahun 2016, cukai korporat mereka adalah sekitar 35 peratus, namun kini cukai korporat mereka telah turun sehingga 21 peratus manakala Malaysia kekal pada kadar sama iaitu 24 peratus sehingga sekarang.

Kadar cukai korporat yang tinggi ini ternyata melemahkan daya saing Malaysia untuk bersaing dengan negara-negara jiran bagi menarik tumpuan pelabur untuk melabur di sini.

Oleh yang demikian, Kerajaan perlu merangka satu kajian yang lebih komprehensif bagi menurunkan kadar cukai korporat ini agar setanding dengan kadar serantau untuk menjadikan Malaysia lebih kompetitif serta berdaya maju dalam meraih tumpuan pelabur antarabangsa yang akhirnya akan menguntungkan negara, peniaga dan rakyat jelata. "

[Menteri Kewangan]

30. PR-1541-U(27)380

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk memastikan kenaikan caj perubatan di hospital dan klinik swasta yang semakin mendapat perhatian di kebanyakan negara termasuk di Malaysia segera ditangani dengan baik oleh Kerajaan memandangkan implikasinya yang besar kepada para pesakit serta sistem kesihatan negara secara keseluruhannya.

Pelbagai faktor mendorong kepada isu ini dengan antaranya ialah kadar caj konsultasi doktor (GP) swasta yang dikawal oleh Akta Kemudahan dan Perkhidmatan Jagaan Kesihatan Swasta (PHFSA) 1998 tidak pernah mengalami sebarang perubahan selama lebih 32 tahun dan menyebabkan pihak terbabit terpaksa menaikkan caj kos operasi yang semakin meningkat, termasuk sewa premis, kos utiliti, peralatan perubatan serta perbelanjaan berkaitan teknologi dan sumber manusia telah meletakkan tekanan besar ke atas klinik swasta.

Situasi tersebut juga diburukkan lagi oleh isu berkaitan Pentadbir Pihak Ketiga (TPA) yang menguruskan pembayaran bagi pesakit yang mempunyai insurans kesihatan yang turut mengalami kenaikan.

Oleh yang demikian, Kerajaan digesa untuk meminda Akta Perkhidmatan Hospital Swasta bagi menetapkan kadar maksimum bagi caj rawatan selain konsultasi doktor, seperti caj penginapan dan penggunaan alat perubatan selain memperkenalkan sistem tiering seperti penarafan hotel bagi membezakan hospital berdasarkan tahap perkhidmatan, membolehkan syarikat insurans menawarkan pelbagai pakej berdasarkan akses kepada hospital tertentu, sesuai dengan kemampuan pelanggan serta mempergiat inisiatif di bawah kerjasama awam dan swasta bagi menyediakan rawatan mampu milik kepada golongan berpendapatan rendah. "

[Menteri Kesihatan]

31. PR-1541-U(27)381

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk mempertimbangkan semula keputusan Kumpulan Wang Simpanan Pekerja (KWSP) yang menjual hampir 10 peratus kepentingan saham ketika harga rendah selepas Disember 2022, sedangkan KWSP telah lama merancang untuk menambah lebih banyak saham Malaysia Airports Holdings Bhd (MAHB) untuk menswastakannya.

Pada 29 November 2022, KWSP telah memiliki 259,917,492 saham iaitu sekitar 15.67 peratus di dalam MAHB dan dalam tempoh satu tahun, KWSP telah menjual 163,363,080 saham, atau hampir 10 peratus kepentingan pada harga sekitar RM6.74 hingga RM7.70 sesaham. Manakala pada 28 Disember 2023 pula, akhirnya KWSP hanya memiliki 96,554,412 saham atau 5.79 peratus sahaja.

Penjualan sebegitu besar dalam tempoh singkat tidak pernah berlaku sebelum ini dan ini menimbulkan persoalan mengapa saham tersebut dijual pada harga rendah tetapi dibeli semula pada harga RM11.00 dengan implikasinya ialah KWSP akan terpaksa membayar tambahan sebanyak RM539 juta sehingga RM696 juta bagi membeli balik saham tersebut.

Justeru itu, Kerajaan digesa untuk mempertimbang dan mengkaji semula keputusan ini dengan lebih berhati-hati memandangkan perkara ini telah menimbulkan keresahan awam kerana membabitkan dana 16.1 juta rakyat Malaysia yang merupakan pencarum KWSP. "

[Menteri Kewangan]

32. PR-1541-U(27)382

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk kembali mempertimbangkan pelaksanaan Cukai Barangan dan Perkhidmatan (GST). Dengan mengambil kira implikasi ekonomi Malaysia yang pada masa ini berada pada tahap yang agak baik serta kestabilan Kerajaan Perpaduan pimpinan YAB Perdana Menteri yang semakin mengukuh, telah ramai pihak termasuklah penganalisis bank berpendapat sekarang adalah masa yang tepat untuk Kerajaan memperkenalkan semula GST.

Menerusi GST, Kerajaan berpotensi untuk meluaskan lagi asas cukai bagi mengurangkan defisit fiskal, mewujudkan ruang utama untuk pelaburan infrastruktur serta menghasilkan peluang bagi mengawal hutang negara dengan lebih baik. Malah, dengan pelaksanaan berperingkat e-invois bermula 1 Ogos 2024, yang juga merupakan antara komponen GST, telah memberikan ruang yang baik untuk Kerajaan melaksanakan kembali GST.

Malaysia tidak harus tertinggal di belakang negara Asia Tenggara lain yang telah melaksanakan GST seperti Indonesia yang melaksanakan Value Added Tax (VAT) pada 1985, Thailand pada tahun 1992 dan Singapura pada 1994 selain GST ini telah dilaksanakan di lebih 170 negara.

Kerajaan boleh menstrukturkan semula GST dengan lebih kemas melalui kerangka dasar yang komprehensif meliputi semua barangan dan perkhidmatan dengan sesetengah barangan boleh dikecualikan, selain satu kadar cukai yang dianggap positif. "

[Menteri Kewangan]

33. PR-1541-U(27)383

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk menimbangkan pengecualian daripada pengeluaran e-Invois kepada Perusahaan Mikro, Kecil dan Sederhana (PMKS) yang mempunyai jualan tahunan di bawah RM500,000 berbanding ketetapan semasa Kerajaan iaitu pengecualian untuk peniaga yang mencatatkan jualan tahunan bawah RM150,000 menjelang pelaksanaan menyeluruh e-Invois bermula 1 Julai 2025.

Pelaksanaan e-Invois ini ternyata telah mewujudkan kebimbangan dalam kalangan para pemain PMKS yang terpaksa menghadapi kekangan kos berikutan perbelanjaan yang tinggi bagi menyediakan sistem pengeluaran serta penyelenggaraan e-Invois di samping risiko margin keuntungan yang rendah.

Peningkatan siling pengecualian e-Invois kepada RM500,000 adalah lebih relevan seperti mana yang pernah dilakukan oleh Kerajaan ketika melaksanakan Cukai Barangan dan Perkhidmatan (GST) sebelum ini dan sekaligus mengurangkan beban lebih banyak segmen pemain PMKS seperti pengusaha yang berniaga dari rumah, ibu tunggal dan peniaga luar bandar yang terpaksa menanggung bebanan implikasi kos yang tinggi.

Oleh yang demikian, Kerajaan disaran untuk mempertimbangkan syor peningkatan pengecualian kepada RM500,000 ini bagi mengurangkan keresahan pemain PMKS dengan pelaksanaan e-Invois yang sebenarnya boleh dielakkan sekiranya Kerajaan memperkenalkan semula GST. "

[Menteri Kewangan]

34. PR-1541-U(27)373

Dato' Sri Dr. Wee Jeck Seng [Tanjung Piai] akan mencadangkan :

"Bahawa Dewan Rakyat ini menggesa Kerajaan untuk melaksanakan kajian secara holistik dan komprehensif bagi menghasilkan benih padi yang berkualiti serta mampu bertahan dalam keadaan perubahan cuaca ekstrem di Malaysia.

Kebelakangan ini perubahan iklim yang ketara telah menjejaskan hasil pengeluaran padi tempatan sebanyak 83,408 tan metrik bersamaan 5.84 juta 10 kilogram pek beras disebabkan oleh musim tengkujuh dan banjir. Penjadualan penanaman padi amat terdedah dengan bencana banjir di musim tengkujuh pada hujung tahun manakala musim penanaman semula padi pada awal tahun pula berisiko diancam keadaan cuaca panas melampau yang perlu diatasi dengan kadar segera.

Sehubungan itu, pihak Kerajaan perlu mengambil langkah yang lebih tegas dan efisien dalam menangani isu ini yang bukan sahaja bagi mempercepatkan pengagihan benih padi kepada pesawah supaya jadual penanaman padi tidak terganggu, malah pihak Kerajaan juga perlu membuat kajian yang teliti bagi menghasilkan benih padi yang lebih berdaya tahan dengan perubahan iklim di Malaysia."

[Menteri Pertanian dan Keterjaminan Makanan]

35. PR-1541-U(27)375

Dato' Sri Dr. Wee Jeck Seng [Tanjung Piai] akan mencadangkan :

"Bahawa Dewan Rakyat ini menggesa Kerajaan untuk menjalankan penelitian semula terhadap kajian bagi persediaan serta perancangan pelan pembangunan pendidikan jangka panjang bagi negara.

Mutakhir ini, kita telah dihabarkan pelbagai peristiwa yang menimbulkan kekusaran masyarakat terhadap ketandusan pembangunan modal insan negara ini terutamanya terhadap generasi baharu yang merupakan generasi yang bakal memimpin dan mentadbir negara tercinta satu hari nanti.

Situasi ini diburukkan lagi dengan statistik kegagalan para pelajar untuk menduduki Sijil Pelajaran Malaysia (SPM) yang hampir setiap tahun mencapai angka yang membimbangkan sehingga mencetuskan kebimbangan. Sejauh mana keseriusan generasi muda ini menilai kepentingan mendapatkan pendidikan untuk membina kehidupan yang lebih baik.

Dalam keadaan negara serantau yang kian pesat membangun, kesediaan dalam melahirkan modal insan menjadi sangat kritikal terutamanya bagi melahirkan generasi yang mampu berdaya saing dan mendepani cabaran serta persaingan dengan negara-negara serantau.

Oleh yang demikian, Kerajaan perlu mengambil pendekatan berstrategi menerusi pembangunan semula pelan pembangunan pendidikan yang lebih efisien bagi memastikan negara kita mampu untuk melahirkan pakej modal insan yang lengkap dan mampu berdaya saing."

[Menteri Pendidikan]

36. PR-1541-U(27)374

Kapten Dato' Dr. Zulkaferi bin Hanapi (Bersara) [Tanjong Karang] akan mencadangkan :

"Bahawa Dewan ini menggesa Kerajaan supaya melaksanakan segera Skim Pembiayaan Kesihatan Kebangsaan demi kepentingan kesejahteraan rakyat serta kemapanan dan kelestarian KKM itu sendiri.

Situasi semasa menunjukkan KKM sangat terbeban dengan belanja mengurus yang sangat tinggi iaitu sehingga 85.07% atau RM38 bilion daripada bajet keseluruhan KKM dan hanya 14.9% yang diperuntukkan untuk bajet pembangunan maka keadaan ini sangat tidak sihat untuk kemapanan dan kelestarian KKM itu sendiri.

Kelemahan, ketidakmampuan dan kegagalan KKM terlihat jelas dengan segala masalah-masalah yang sentiasa menjadi rungutan rakyat dan juga sering diangkat oleh ramai Ahli-ahli Parlimen - seperti kekurangan jururawat, kekurangan doktor dan doktor pakar serta masalah doktor kontrak, Kekurangan ambulans, ketiadaan ubat, alat-alat perubatan terlalu lama, klinik-klinik daif, hospital yang berumur lebih 50 tahun, hospital yang sesak, tiada sistem komputer, pesakit terpaksa menunggu terlalu lama.

Ketahuiilah permasalahan dan segala kelemahan KKM ini sebenarnya adalah manifestasi dari kekangan fiskal KKM itu sendiri. Keupayaan KKM dengan 14.9% bajet untuk Pembangunan adalah sangat-sangat terbatas dan ini boleh menyebabkan kualiti dan mutu perkhidmatan KKM terjejas dan terus dipersoalkan rakyat.

Dengan situasi begini adalah diharapkan penyelesaian segera dan menyeluruh dengan menubuhkan Jawatankuasa Bertindak bagi melaksanakan segera Skim Pembiayaan Kesihatan Kebangsaan."

[Menteri Kesihatan]

37. PR-1541-U(27)400

Datuk Seri Panglima Madius Tangau [Tuaran] akan mencadangkan :

"Bahawa Dewan Rakyat ini menggesa Kerajaan menerima kewujudan Seksyen (1) Perkara 112C Bahagian 4 Jadual Kesepuluh dan Seksyen (2) Bahagian 4 Jadual Kesepuluh dalam Perlembagaan Persekutuan serta penguatkuasaannya dan menerima hakikat bahawa hak ini adalah hak-hak Perlembagaan Rakyat Sabah.

Menerima juga hakikat bahawa kekeliruan dalam pelaksanaan hak-hak perlembagaan ini dan bahawa selama 44 tahun (1974 – 2018), kadar pemberian khas di bawah peruntukan tersebut gagal dikaji oleh Kerajaan Persekutuan.

Memperakui langkah-langkah yang telah diambil oleh pihak Kerajaan selepas penubuhan Kerajaan Pakatan Harapan 2018 sehingga kini iaitu bermula dengan menaikkan pemberian kepada RM53.4 juta, kemudian dinaikkan Kerajaan Perikatan Nasional ke RM125.6 juta, pada tahun 2023, dan kemudian Kerajaan Madani naikkan kepada RM300 juta dan baru-baru ini dinaikkan lagi kepada RM600 juta.

Dan menerima hakikat bahawa semua langkah-langkah ini bersifat sementara (interim) sebelum Kerajaan Sabah dan Kerajaan Persekutuan untuk melaksanakan hak Perlembagaan Rakyat Sabah sepenuhnya.

Menerima hakikat bahawa pelaksanaan ini mengambil masa begitu panjang sehingga sekarang iaitu negara Malaysia sudah berusia 61 tahun. Maka, Tuaran ingin mengusulkan supaya Dewan yang mulia ini membuat Keputusan untuk melaksanakan Hak Perlembagaan Rakyat Sabah ini secara tuntas termasuk meminda perkara 97(1) Perlembagaan Malaysia untuk membolehkan kerajaan Sabah memungut 40% daripada pungutan hasil Persekutuan daripada Sabah secara langsung."

[Perdana Menteri]

38. PR-1541-U(27)401

Datuk Seri Panglima Madius Tangau [Tuaran] akan mencadangkan :

"Bahawa Dewan Rakyat ini menggesa Kerajaan Menerima Sejarah perang saudara di Selatan Filipina pada awal 70-an yang mengakibatkan ribuan pelarian perang dari Filipina melarikan diri ke Sabah. Menerima hakikat bahawa Pertubuhan Bangsa-Bangsa Bersatu (PBB) melalui Suruhanjaya Tinggi Persekutuan Bangsa-Bangsa Bersatu Untuk Pelarian (UNHCR) telah turun padang dan membantu pelarian ini dengan mewujudkan sekurang-kurangnya lima (5) skim penempatan pelarian di Sabah (Telipok, Kinarut, Kampung Bahagia Sandakan, Kampung Selamat Semporna dan Kampung Hidayat Tawau).

Dan menerima hakikat Kerajaan Sabah telah bekerjasama dengan UNHCR sehingga mewujudkan sebuah bahagian di Jabatan Ketua Menteri untuk menguruskan penempatan UNHCR ini.

Menerima juga hakikat apabila setelah UNHCR menyerahkan penempatan ini kepada Federal Task Force di bawah Majlis Keselamatan Negara, terdapat keclaruan dari segi urusan tadbir pelarian perang Filipina di Sabah, sehinggakan penempatan mereka telah bercampur aduk dengan mereka yang bukan pelarian yang menyebabkan banyak masalah dari segi urusan tadbir kewarganegaraan dan pelbagai aspek bantuan kemanusiaan.

Menerima hakikat bahawa pelarian perang Filipina ini telah diberi pelbagai dokumen bermula dengan kad burung-burung, kad banci dan selepas itu dokumen IMM13 sehingga sekarang. Menerima juga hakikat bahawa pelbagai pendekatan untuk menaik taraf bentuk dan cara pengeluaran dokumen ini telah banyak dipolitikkan dan akhirnya kini tidak ada kata putus apakah dokumen baru yang diberikan kepada golongan pelarian perang Filipina ini.

Menerima juga hakikat bahawa satu Suruhanjaya Siasatan Diraja telah ditubuhkan oleh Parlimen Malaysia mencari penyelesaian tuntas terhadap kehadiran golongan pelarian perang Filipina di Sabah, namun itu pun telah gagal memberi apa-apa penyelesaian, Malah ramai yang menganggap langkah ini sebagai mainan politik semata-mata.

Oleh sebab itu, Tuaran mengesyorkan supaya Dewan yang mulia ini membahaskan masalah pelarian perang Filipina dengan mengambil kira bagaimanakah masa depan mereka yang kini sudah tiga generasi beranak pinak di Sabah sehingga Kerajaan dapat mengambil Tindakan yang tegas sebelum masalah ini menjadi lebih besar yang boleh menggugat kestabilan dan kedaulatan negara."

[Perdana Menteri]

39. PR-1541-U(27)402

Datuk Seri Panglima Madius Tangau [Tuaran] akan mencadangkan :

"Bahawa Dewan Rakyat ini menggesa Kerajaan Menerima hakikat bahawa kos pembekalan elektrik (penjanaan, penghantaran dan pengagihan) di Sabah adalah lebih tinggi daripada kadar jualan seunit elektrik menyebabkan Sabah Electricity Sdn. Bhd (SESB) mengalami kerugian dan terpaksa bergantung kepada subsidi sokongan tarif (TSS) daripada Persekutuan dengan kadar RM850 juta setahun.

Menerima juga hakikat bahawa Kerajaan perlu mengambil langkah-langkah bagi memastikan penjanaan elektrik mencapai 40% rizab margin dan kos pembekalan elektrik berada di bawah paras jualan untuk mengurangkan beban Kerajaan Persekutuan dalam menampung subsidi sokongan tarif (TSS).

Oleh itu, maka dengan ini Tuaran mengesyorkan agar Dewan yang mulia ini dapat membahaskan langkah-langkah yang boleh diambil sehingga Kerajaan dapat mencari jalan penyelesaian yang tepat untuk menstabilkan bekalan elektrik di Sabah."

[Menteri Peralihan Tenaga dan Transformasi Air]

40. PR-1541-U(27)403

Datuk Seri Panglima Madius Tangau [Tuaran] akan mencadangkan :

"Bahawa Dewan Rakyat ini menggesa Kerajaan Menerima hakikat bahawa import makanan negara masih lagi tinggi termasuklah makanan ternakan.

Dan menerima hakikat bahawa tanah yang masih luas untuk dimajukan sebagai tanah pertanian terdapat di Sabah dan Sarawak.

Menerima juga hakikat infrastruktur perhubungan masih lagi pada tahap yang rendah menyebabkan pelbagai usaha untuk meningkatkan keterjaminan makanan terhalang.

Maka itu, Tuaran mengusulkan agar Dewan yang mulia ini ditangguhkan untuk membincangkan langkah-langkah dalam mengatasi dan menaik taraf jalan-jalan pertanian di Sabah dan Sarawak."

[Menteri Pertanian dan Keterjaminan Makanan]

41. PR-1541-U(27)404

Datuk Seri Panglima Madius Tangau [Tuaran] akan mencadangkan :

"Bahawa Dewan Rakyat ini menggesa Kerajaan Menerima Hakikat bahawa kawal selia bekalan elektrik di Sabah telah pun diserahkan kepada Kerajaan Sabah daripada Kerajaan Persekutuan selepas Kelulusan Rang Undang-Undang Pihak Berkuasa Tenaga Boleh Baharu (Pindaan) 2023 (Akta 725) dan Rang Undang-Undang Pihak Berkuasa Pembangunan Tenaga Lestari (Pindaan) 2023 (Akta 726) dalam Dewan Rakyat pada 2023.

Menerima hakikat penyerahan kawal selia telah dimuktamadkan selepas Dewan Undangan Negeri (DUN) Sabah meluluskan tiga Rang Undang-Undang Perlembagaan Negeri Sabah pada 3 Januari 2024 berkaitan pengambilalihan kuasa kawal selia bekalan elektrik daripada Kerajaan Persekutuan membabitkan RUU Bekalan Elektrik 2024, Tenaga Boleh Baharu 2024 dan RUU Suruhanjaya Tenaga Sabah (Pindaan) 2024.

Dan menerima hakikat bahawa kawal selia bekalan elektrik di Sabah kini berada di bawah Suruhanjaya Tenaga Sabah (ECoS), manakala Wilayah Persekutuan Labuan masih di bawah seliaan Suruhanjaya Tenaga (ST) Malaysia.

Menerima juga hakikat bahawa Syarikat Sabah Electricity Sdn. Bhd. (SESB) merupakan satu-satunya Syarikat utiliti yang membekalkan tenaga elektrik kepada Wilayah Sabah dan wilayah Persekutuan Labuan.

Dan menerima hakikat bahawa geografi Labuan adalah lebih dekat dengan Sabah berbanding dengan Semenanjung Malaysia.

Justeru, Tuaran mengesyorkan agar Dewan yang mulia ini ditangguhkan bagi membuat keputusan pemindahan kawal selia bekalan elektrik Labuan daripada ST kepada ECoS bagi memudahkan pemantauan, meningkatkan kecekapan pengurusan serta mempermudah segala urusan dan menjimatkan kos."

[Menteri Peralihan Tenaga dan Transformasi Air]

42. PR-1541-U(27)405

Datuk Seri Panglima Madius Tangau [Tuaran] akan mencadangkan :

"Bahawa Dewan Rakyat ini menggesa Kerajaan Menerima hakikat Sejarah bahawa Pulau Labuan diserahkan oleh Kerajaan Sabah menjadi Wilayah Persekutuan dengan niat suci untuk tujuan membangunkan Labuan dengan pesat.

Menerima hakikat Kerajaan Persekutuan telah gagal membangunkan Labuan termasuk menyediakan utiliti bekalan air dan elektrik.

Menerima hakikat bahawa rakyat Labuan adalah juga rakyat Sabah yang masih terikat dengan adat istiadat Sabah dan oleh itu masih lagi memerlukan perkhidmatan sistem Mahkamah Anak Negeri dan seterusnya memerlukan bimbingan dan perkhidmatan di pelbagai agensi Kerajaan Sabah.

Menerima hakikat bahawa penyerahan Labuan sebagai Wilayah Persekutuan telah dibuat tanpa mengambil kira kesan terhadap persempadanan Sabah.

Dan menerima hakikat penyerahan Labuan sebagai Wilayah Persekutuan tidak diberi pampasan walau satu sen pun kepada Sabah.

Menerima hakikat bahawa Pulau Labuan terlalu dekat dengan Sabah dan penduduk serta rakyat Labuan mempunyai ikatan yang sangat kuat dengan penduduk Sabah.

Maka dengan itu, Tuaran menyusulkan di Dewan yang mulia ini agar Kerajaan Persekutuan mengembalikan semula Labuan kepada Sabah."

[Perdana Menteri]

****UCAPAN-UCAPAN**
(PERATURAN MESYUARAT 17)
(KAMAR KHAS)

Ahli Yang Berucap	Tajuk Ucapan	Menteri Yang Bertanggungjawab
YB Dato' Indera Mohd Shahar bin Abdullah (Paya Besar)	1. Perancangan Kerajaan dalam Membangunkan Semula Projek Terbengkalai PARK Sungai Pandan, Kuantan Pahang 2. Status Terkini Kejadian Tanah Runtuh Taman Gambang Damai dan Isu Hakmilik Strata Carribbean Bay Resort Bukit Gambang Resort City Gambang	1. YB Menteri Perumahan dan Kerajaan Tempatan 2. YB Menteri Perumahan dan Kerajaan Tempatan
YB Tuan Riduan bin Rubin (Tenom)	1. Penetapan Harga Siling Caj Perkhidmatan yang Dikenakan Oleh Ejen Pekerja Asing Demi Kestabilan Ekonomi dan Kesejahteraan Industri 2. Isu Pemerdagangan Manusia Menerusi Sindiket Penipuan Tawaran Pekerjaan	1. YB Menteri Sumber Manusia 2. YB Menteri Dalam Negeri

**** Ucapan Di Bawah Usul Berkenaan Perkara Tadbir Kerajaan (Peraturan Mesyuarat 17)**